



ALIJA
IZETBEGOVIĆ
M U Z E J

NEWSLETTER

JU MUZEJ "Alija Izetbegović" Sarajevo
Broj 5/2021 | Septembar 2021.

2

AKTIVNOSTI

Prvi ciklus Ljetne škole diplomatije u organizaciji JU Muzeja "Alija Izetbegović"

...

8

AKTUELNOSTI

Posjeta predsjednika Republike Turske Recepta Tayyipa Erdoğanu Šehidskom mezarju „Kovači“

...

10

GODIŠNJICE

Godišnjica rođenja predsjednika Alije Izetbegovića

...



FOTO: Arhiva Muzeja "Alija Izetbegović"



FOTO: Muzej "Alija Izetbegović"

Prvi ciklus Ljetne škole diplomatije u organizaciji JU Muzeja "Alija Izetbegović"

Prvi ciklus Ljetne škole diplomatije u organizaciji JU Muzeja „Alija Izetbegović“ je okupio četrnaest polaznika - studenata I, II i III ciklusa studija društvenih, humanističkih i političkih nauka. Preko stotinu aplikacija je iskazalo svoj interes za participacijom, a svim studentima koji nisu ušli u užu krug i bili izabrani, bilo je omogućeno da prate predavanja putem video linka. Većina polaznika su socijalno i politički angažirani, te zaposleni u sektorima koji se usko bave naučnim radom, NVO aktivnostima i volontiranjem.

Prvi ciklus ljetne škole diplomatije je okupio eminentne profesore, diplomate i ambasadore. Predavači su ovom prilikom nesebično diskutovali i razmijenjivali iskustva i mišljenja sa polaznicima u cilju bližeg upoznavanja sa diplomatijom kao ključem uspjeha za učestvovanje u međunarodnim odnosima. Na ovaj način, polaznici su imali priliku da nauče više o tehnikama i metodama pregovaranja, komuniciranja, debatiranja i razmjereni kritičkog mišljenja.



FOTO: Muzej "Alija Izetbegović"

Tokom prvih četiri dana Ljetne škole, aktivnosti i predavanja su se održavale u prostorijama Homework HUB-a u Sarajevu. Škola

je otvorena 12. avgusta 2021. godine na Međunarodni dan omladine. Na svečanom otvorenju, gostima, medijima i polaznicima ljetne škole se obratila direktorica JU Muzeja „Alija Izetbegović“ Nađa Berberović – Dizdarević, te direktor Homework HUB-a Mirza Rashtoder.



FOTO: Muzej "Alija Izetbegović"

U okviru prvog dana Ljetne škole predavanja je održao dipl. ing. građ. te pisac, publicist i političar Faris Nanić, koji je govorio o diplomatskim naporima Alije Izetbegovića na međunarodnom priznanju Bosne i Hercegovine, njezinoj multilateralnoj afirmaciji i bilateralnoj saradnji i odbrani od agresije.

U poslijepodnevima su gostovali N.J.E. ambasador Države Palestine u BiH, Rezeq Namoor; N.J.E. ambasador Republike Turske u BiH Sadik Babür Girgin; N.J.E. ambasador Islamske Republike Pakistan u BiH Muhammad Khalid Rao i na kraju N.J.E. ambasador Narodne Republike Kine u BiH Ji Ping. Ambasadori su u svojim predavanjima stavili akcenat na politiku i strategije zemalja, čiji su diplomatski predstavnici, kada je riječ o Bosni i Hercegovini, te regiji zapadnog Balkana uopće.



FOTO: Muzej "Alija Izetbegović"

Drugog dana Ljetne škole upriličeno je predavanje prof. dr. Azre Hadžiahmetović, redovne profesorice na Ekonomskom fakultetu Univerziteta u Sarajevu, na širu temu ekonomske diplomatije i njezinim metodama, strategijama, instrumentima, modalitetima i ciljevima. U poslijepodnevima gostovali su N.J.E. ambasadori Bosne i Hercegovine u Kraljevini Norveškoj Nedim Makarević i Republici Turskoj Adis Alagić. Ambasador Makarević je u fokus svog predavanja stavio Javnu diplomatiju & Soft Power, dok je ambasador Alagić govorio o ulozi NVO i počasnih konzula u odnosima Republike Turske i Bosne i Hercegovine.

FOTO: Muzej "Alija Izetbegović"



Trećeg dana, dr. Emir Hadžikadunić je upriličio predavanje koje se tiče strateške dubine Bosne i Hercegovine, diplomatskih odnosa BiH sa državama članicama OIC-a te ličnih iskustava iz diplomatskih misija iz Islamske

Republike Iran i Malezije. N.J.E. ambasador Islamske Republike Iran Gholamreza Alimohammad Ghelichkhan je u poslijepodnevnom predavanju govorio o historijskim i aktuelnim odnosima Bosne i Hercegovine i Irana, iranjskim vanjskopolitičkim i unutarnjopolitičkim aktivnostima. Neposredno potom, u predavanju N.J.E. generalnog konzula Bosne i Hercegovine u Chicagu Elvira Resića bilo je govora o organizaciji bosanskohercegovačkih iseljeničkih zajednica u Sjedinjenim Američkim Državama uopće i Chicagu konkretno.



FOTO: Muzej "Alija Izetbegović"

U okviru četvrtog dana, 15. avgusta 2021. godine, održano je petosatno predavanje dr. Jasmina Hasića, vanrednog profesora na Sarajevu School of Science and Technology i dr. sci. Nedžme Džananović – Mirašćija, vanredne profesorice na fakultetu Političkih nauka na Univerzitetu u Sarajevu. Teme koje su obrađene ovom prilikom su se ticale savremenih trendova u diplomatijama malih zemalja; Bosne i Hercegovine i učešća u međunarodnim članstvima; Vanjske politike EU i BiH, NATO i BiH; „Zaštite i promocije interesa građana BiH u inostranstvu“: Vanjskopolitičkih odnosa BiH sa bh. dijasporom.



FOTO: Muzej "Alija Izetbegović"

Drugi dio Ljetne škole diplomatije je bio rezerviran za studijske posjete, te je petog dana, 16. avgusta 2021. godine, uz podršku HO MDD „Merhamet“ realizovana posjeta rodnoj kući Alije Izetbegovića u Bosanskom Šamcu. Pored spomen sobe, u obnovljenoj rodnoj kući

predsjednika Izetbegovića, čiju obnovu je finansirala TIKa, nalazi se i sjedište HO MDD „Merhamet“ za Bosanski Šamac.



FOTO: Muzej „Alija Izetbegović“

Posjeta Galeriji 11/07/95 je organizirana 17. augusta 2021. godine u suradnji sa dugogodišnjim prijateljem i vlasnikom istoimene multimedijalne Galerije, svjetski poznatim fotografom Tarikom Samarahom. Polaznici Ljetne škole su imali priliku da kroz raznovrstan multimedijalni sadržaj dobiju uvid u dokumentarnu i umjetničku interpretaciju dešavanja tokom genocida u Srebrenici iz 1995. godine. Memorijalna Galerija 11/07/95 predstavlja bitan element u prezervaciji kulture sjećanja i borbe protiv raznih oblika nasilja.



FOTO: Muzej „Alija Izetbegović“

Istog dana, u poslijepodnevnom satima, studente/ice je ugostio član Predsjedništva Bosne i Hercegovine, gosp. Šefik Džaferović. Tokom sastanka je diskutovano o važnosti projekta Ljetne škole diplomatije za budućnost diplomatije naše države. Predsjednik Džaferović je podijelio lična iskustva i mišljenja o trenutnoj političkoj situaciji sa polaznicima Ljetne škole, te se osvrnuo na privatni odnos prema rahmetli predsjedniku Aliji Izetbegoviću.

Domaćin Ljetne škole diplomatije 18. augusta 2021. godine bio je sekretar Ministarstva vanjskih poslova Bosne i Hercegovine, gosp. Bakir Sadović. Tokom dvosatnog sastanka

učesnici su imali priliku diskutovati o raznim temama sa gosp. Sadovićem koji je podijelio iskustva iz svoje plodonosne diplomatske karijere. Također je bilo govora o aktuelnim aktivnostima Ministarstva vanjskih poslova, te o praksama i prirodi posla diplomatskih predstavnika. Svečanom ceremonijom dodjele certifikata svim polaznicima od strane sekretara Ministarstva vanjskih poslova gosp. Bakira Sadovića, 19. augusta 2021. godine, uspješno je završen prvi ciklus Ljetne škole diplomatije u organizaciji JU Muzej „Alija Izetbegović“. Svi učesnici i predavači su dobili prigodne poklone od JU Muzej „Alija Izetbegović“ i partnera projekta BH Telecom, dok je na ceremoniji dodjele certifikata učesnicima također poklonjen set izabranih djela Alije Izetbegovića.



FOTO: Muzej „Alija Izetbegović“

Nakon sedmodnevne ljetne škole, u okviru post-fellowship programa, polaznicima će biti dodijeljeni mentori s kojim će koordinirati pisanje naučnog rada tematski vezanog za diplomatiju. Svi radovi će biti objavljeni u Zborniku radova JU Muzeja „Alija Izetbegović“. Učesnici će moći birati između nekoliko ponuđenih tema, s fokusom na ono što su naučili u okviru trajanja ljetne škole, te pristupu koji im daje prostor da tu temu dodatno istraže i razviju. Tri najbolja rada, odabrana od strane stručne komisije, biće nagrađena vrijednim nagradama u organizaciji JU Muzeja „Alija Izetbegović“.

Cilj je da ovaj projekat zadrži ozbiljan akademski i diplomatski background, te da preraste u tradicionalnu aktivnost koja će aktivno participirati u produkciji i edukaciji mladih i novih imena na polju diplomatije.

JU Muzej „Alija Izetbegović“ iskazuje zahvalnost svim predavačima i polaznicima koji su svojim učešćem doprinijeli da Ljetna škola diplomatije bude svima na ponos.



FOTO: Muzej „Alija Izetbegović“



Otvorenje izložbe fotografija „Alija Izetbegović, prijatelji i saradnici“

U četvrtak, 5. augusta 2021. godine, u organizaciji JU Muzej "Alija Izetbegović" zvanično je otvorena izložba fotografija "Alija Izetbegović, prijatelji i saradnici" u suradnji sa Općinom Novi Grad.

Izložbu kojom se simbolično obilježava datum rođenja prvog predsjednika nezavisne BiH Alije Izetbegovića je otvorila direktorica Muzeja Nađa Berberović – Dizdarević, a prisutnima se obratio i ministar kulture i sporta KS Gdin. Samir Avdić.



Izložba fotografija "Alija Izetbegović, prijatelji i saradnici" je pružila zanimljiv prikaz međusobnih odnosa Alije Izetbegovića i ljudi iz raznih sfera društvenog života s kojima je Izetbegović održavao privatni i poslovni kontakt. Fotografije, u okviru izložbe, su bile

popraćene odgovarajućim citatima i izjavama historijskih ličnosti o Izetbegoviću.

Otvorenju izložbe su prisustvovali i predstavnici diplomatskog kora, njihove ekselencije ambasador Države Palestine Gdin. Rezeq Namoor, ambasador Islamske Republike Iran Gdin. Gholamreza Alimohammad Ghelichkhan i ambasador Arapske Republike Egipat Gdin. Yasser Sorour.

Izložba je bila otvorena za javnost do 17. augusta 2021. godine, a ulaz je bio slobodan za sve posjetioce.



Izložba fotografija „Diplomatski put Alije Izetbegovića“ u Kakanju

U Parku Doma kulture je 10. augusta 2021. godine prezentovana izložba "Diplomatski put Alije Izetbegovića".

Izložba je bila upriličena povodom 31. godišnjice od osnivanja Općinskog odbora Stranke demokratske akcije (SDA) Kakanj. Izložbi je prisustvovao predsjednik SDA gosp. Bakir Izetbegović.

Izložba je bila dostupna posjetiocima do 17. augusta 2021. godine u prostorijama JU KSC Kakanj, a ulaz je bio slobodan.

Polaganje cvijeća i učenje Fatihe na mezaru rahmetli predsjednika Alije Izetbegovića

Polaganjem cvijeća i učenjem Fatihe na mezarju Kovači u Sarajevu 8. augusta 2021. godine je obilježeno 96 godina od rođenja prvog predsjednika Predsjedništva Republike Bosne i Hercegovine Alije Izetbegovića.

Cvijeće na Kovačima položio je predsjednik Stranke demokratske akcije Bakir Izetbegović, član Predsjedništva BiH Šefik Džaferović, delegacija Asocijacije mladih SDA, kao i drugi zvaničnici, piše **Stav.ba**.

"Njemu lično, sasvim sigurno, ne trebaju ovakva okupljanja i neka posebna sjećanja. Nikada nije volio rođendane. Mislim da njemu to ne treba, ali nama sigurno treba. Jer kada neko za Bošnjake izjavi da su jedan podanički, kukavički narod koji je promijenio

vjeru, onda se možemo sjetiti tog vremena koji simbolizira rahmetli Alija Izetbegović, kada su stotine hiljada ljudi i žena borili se upravo za slobodu, dostojanstvo, za svoju zemlju i vjeru", pojasnio je Izetbegović. Podsjetio je na riječi Alije Izetbegovića da BiH nije samo parče zemlje na Balkanu nego da je to ideja da različite vjere, nacije i kulture mogu da žive zajedno.



Član Predsjedništva BiH Šefik Džaferović poručio je da je Alija Izetbegović najznačajnija ličnost u modernoj historiji BiH.

"Bio je na čelu BiH onda kada je ona ostvarila svoju nezavisnost, kada se branila od agresije. BiH je danas nezavisna država, odbranjena od agresije i izgrađuje se u miru. To su epohalna postignuća i uvijek ćemo biti zahvalni rahmetli predsjedniku na svemu što je učinio za BiH. Koristit ćemo svaku priliku da se sjećamo, odajemo poštovanje i da mu se zahvaljujemo na tome šta je uradio za cijelu BiH, sve nas. Ono što bih posebno istakao jeste da su mudrost, tolerancija i razumijevanje Alije Izetbegovića, vezano za sve društvene procese, nešto što je danas prijeko potrebno BiH", dodao je Džaferović.





FOTO: D.S./Klix.ba



FOTO: AA

Jevrejska 5782. nova godina



FOTO: AA

Sa zalaskom sunca, 6. septembra 2021. godine je započela Jevrejska 5782. nova godina.

Period od deset dana poslije nove godine je vrijeme kada se Jevreji preispituju u pogledu minule godine, te se mole Bogu da bi bili „upisani u knjigu života“.

JU Muzej „Alija Izetbegović“ njeguje tradiciju suživota i kohabitacije promovisanu u djelu našeg rahmetli predsjednika Alije Izetbegovića, te tim povodom svim Jevrejima u Bosni i Hercegovini čestita Jevrejsku novu godinu.

„A to što mi nazivamo Bosnom nije samo parče zemlje na Balkanu. Za mnoge od nas Bosna nije samo domovina, Bosna je ideja. To je uvjerenje da ljudi različitih vjera, nacija i kulturnih tradicija, mogu živjeti zajedno“, kazao je Alija Izetbegović u govoru na 49. zasjedanju Generalne skupštine UN-a u New Yorku, 27. septembra 1994. godine.



Posjeta predsjednika Republike Turske Recepta Tayyipa Erdoğana Šehidskom mezarju „Kovači“

Predsjednik Republike Turske Recep Tayyip Erdoğan je, u sklopu jednodnevne posjete Bosni i Hercegovini, 27. augusta 2021. godine posjetio Šehidsko mezarje Kovači.

Tom prilikom je odao počast i proučio Fatihu na mezaru prvog predsjednika Predsjedništva Republike Bosne i Hercegovine Alije Izetbegovića.

U delegaciji Republike Turske, pored predsjednika Erdoğan, bili su još i njegova supruga Emine te državni ministri trgovine Mehmet Mus, te kulture i turizma Mehmet Nuri Ersoy, glasnogovornik ureda predsjednika Erdoğan Ibrahim Kalin i šef ureda za komunikacije Fahrettin Altun. Turskoj delegaciji su se pridružili član Predsjedništva Bosne i Hercegovine Šefik Džaferović i reisul-ulema Islamske zajednice u BiH Husein ef. Kavazović.

„Historiju naroda dijelom pišu i njihovi junaci; u najmanju ruku, veliki preokreti nose pečat imena prvaka. Narodi koji ispisuju stranice povijesti imaju svoje junake koji, također, pišu povijest. Za Bosnu i Hercegovinu takav junak je bio Alija Izetbegović. On je utemeljitelj nezavisne države Bosne i Hercegovine. On je lider

o kojem se najviše govorilo u posljednjem desetljeću dvadesetog stoljeća.

U svakom razdoblju svog života išao je ispred svoga naroda. Svakome je pokazao da je borac za slobodu koji ne zna pokleknuti pred pritiscima, lider koji stoji na čelu svog naroda u borbi za nezavisnost, vođa koji je uspješnim vojnim i diplomatskim potezima uspio stvoriti državu.“ (Ocjena Recepta Tayyipa Erdoğan o historijskoj ulozi Alije Izetbegovića u knjizi „Dostojanstvo ljudskog izbora“).



FOTO: D.S./Klix.ba

Smrt dr. Rizvana Halilovića

Dr. Rizvan Halilović, aktivista i borac za jedinstvo Bošnjaka, preselio je na ahiret 26. augusta 2021. godine.

Bio je predsjednik Udruženja bosansko-turskog prijateljstva "Bosfor". Rođen je u Bijelom Polju, da bi između 1974. i 1993. godine živio i radio u Kumanovu, gdje je, između ostalog, obnašao funkciju predsjednika makedonskog ogranka Stranke demokratske akcije (SDA).

Zbog represalija na političkoj osnovi, iz rodnog Bijelog Polja 1995. godine odlazi u Tursku, odakle se vraća šest godina kasnije i nastanjuje se u Sarajevu.

Tokom svoje plodonosne karijere, bio je član više instituta (član Asocijacije nezavisnih intelektualaca KRUG 99, član SDA BiH, član Vijeća Kongresa bošnjačkih intelektualaca, zatim član Predsjedništva Udruženja Bošnjaka porijeklom iz Sandžaka u BiH, potpredsjednik Skupštine BZK „Preporod“ i na koncu predsjednik Udruženja BTP BOSFOR).

Dženaza dr. Rizvanu Haliloviću je klanjana 30. augusta 2021. u haremu Gazi Husrev-begove džamije u Sarajevu. Sjećamo ga se s ponosom i posebnim pijetetom. Neka je njegovoj duši vječni rahmet, a porodici sabur.



FOTO: Arhiva Muzeja "Alija Izetbegović"

Godišnjica rođenja predsjednika Alije Izetbegovića

Prvi predsjednik nezavisne, međunarodno priznate, Republike Bosne i Hercegovine, Alija Izetbegović je rođen 8. augusta 1925. godine u Bosanskom Šamcu.

JU Muzej "Alija Izetbegović" čuva sjećanje na lik i djelo predsjednika Izetbegovića, podsjećajući na njegovu nezaobilaznu ulogu tokom najkritičnijeg perioda u historiji naše zemlje.

Po ocjeni mnogih relevantnih savremenika, politika na čijem je čelu, i čiji je jedan od kreatora bio rahmetli predsjednik, najzaslužnija je za nastanak i opstanak Bosne i Hercegovine.

"Aliju Izetbegovića često sam susretao. Imao sam dojam da silno pati. Jer život mu je dodijelio ulogu koja je nadrastala njegove snage. No, on se borio i nastojao učiniti ono što je bilo moguće. Pri tom sam naučio poštovati ga, računajući s tim da se u životnoj borbi mogu načiniti i pogreške. Stoga, dok se prisjećamo Alije Izetbegovića, želim da mu Svemogućí i Svevišnji bude milostiv i da ga nagradi za sva njegova poštena nastojanja i za sva njegova poštena djela koja je tokom života učinio.", kazao je o rahmetli predsjedniku Aliji Izetbegoviću bivši provincijal Bosne Srebrene Petar Anđelović (Izjava za Dnevni avaz, 19. oktobar 2006. godine)

"Alija Izetbegović bio je čovjek koji je svim svojim bićem, dušom i tijelom, mrzio samu ideju rata. Ali kada je došao trenutak da bude uvučen u rat zbog same agresije, zbog potrebe da spasi svoj narod, ne samo da je ušao u rat nego je izašao kao pobjednik. Ta ideja mudrog čovjeka, čovjeka od knjige, vjernika, koji je prisiljen ratovati i koji to čini uspješno, ispunjavajući svoju dužnost i koji pri tome još izlazi kao pobjednik je za mene jedna od najdirljivijih ideja općenito." – Bernard-Henry Lévy, francuski književnik i pisac (izjava za novinare prilikom posjete Muzeju "Alija Izetbegović").

Godišnjica „Pećigradskog boja“



FOTO: Zasrebrenicu.ba

Jedna od ključnih operacija slavnog 5. korpusa Armije Republike Bosne i Hercegovine bila je ona pod kodnim nazivom "Sloboda-94". U sklopu te briljantno izvedene operacije, 4. augusta 1994. godine jedinice Armije RBiH su oslobodile okupirani Pećigrad, jednu od jačih baza samoproglašene Autonomne Pokrajine Zapadna Bosna.

U jutarnjim satima, najelitnije jedinice 5. korpusa su krenule u finalni obračun sa pripadnicima Narodne Odbrane APZB.

Usljed neuspješnih pregovora, nakon što je vođa pregovaračkog tima Autonomaških snaga, Besim Muhamedagić Zenga, izvjestio komandu 5. korpusa da se neće predati, kao upozorenje na pećigradski Stari grad je ispaljena jedna tenkovska granata. Od ove granate je stradao Zenga. Neposredno nakon toga dolazi do predaje, čime je završen prvi dio operacije poznat kao "Pećigradski boj".

"Vojnici Narodne Odbrane, ja vas upozoravam i molim zadnji put, razgovarao sam sa vašim predstavnicima, prema vama koji se predate, bit će korektno postupano(...) Većina građana, ili svi, bit će vraćeni svojim kućama. Mi ne želimo više da se proliva naša krv po našem tlu. I zato, ja vas još jednom upozoravam, da napustite grad. Da se predate 511. i 502. Slavnoj brigadi(...) Vi nemate šanse da izađete iz Pećigrada, mi znamo, a i vi, da smo sve prolaze zatvorili. Ovi ljudi koji su se predali, prema njima, u to su se uvjerali vaši komandiri, se korektno postupaju", riječi su generala Atifa Dudakovića upućene snagama NO u Pećigradu, pred njihovu konačnu predaju.

Sjećanje na gaziju i komandanta Izeta Nanića




FOTO: Arhiv.stav.ba

Prije dvadeset i šest godina poginuo je gazija i komandant bužimске 505. Viteške brdske brigade, Izet Nanić.

Nanić je bio od onih starješina koji su, po mišljenju saboraca, od Boga poslani u pravom momentu za spas svoga naroda.

Nanić je po napuštanju JNA došao u Bužim, te postao jedan od vodećih ljudi u organizaciji odbrane i formiranju vojnih jedinica.

Pod njegovim vodstvom, brigada koja je bila poznata po svom pobjedničkom duhu, je visoko kotirala u okvirima Armije Republike Bosne i Hercegovine, te joj je dodijeljen počasni naziv "Viteška".

Izetu Naniću je posthumno dodijeljen "Orden heroja oslobodilačkog rata" 1998. godine te je unaprijeđen u čin brigadnog generala.

"Sutra, kad se rasformira ova brigada, kad električar bude električar, a ne obavještajac, kad vi svi borci budete na svojim radnim mjestima, da se isto ovako družite, poštujuete i uvažavate. Samo tako ćemo mi biti skupa svi zajedno. Jer i poslije rata je rat!", kazao je rahmetli Izet Nanić u jednom od svojih govora borcima brigade kojom je komandovao.



FOTO: Arhiva Muzeja "Alija Izetbegović"

Godišnjica presude u tzv. „Sarajevskom procesu“

Suđenje bošnjačkim intelektualcima montiranog "Sarajevskog procesa" je završeno izricanjem presude 20. augusta 1983. godine.

Optužnica je bila zasnovana na članovima 114. i 133. Krivičnog zakona SFRJ, dakle za "udruživanje u cilju ugrožavanja društvenog poretka i kontrarevolucionarno djelovanje" i famozni "verbalni delikt". Presuda nije u velikoj mjeri odstupala od optužnice, te su njome izrečene drakonske kazne, po kojima su optuženi osuđeni na 89,5 godina zatvora.

Alija Izetbegović je osuđen na 14 godina, da bi ta presuda bila revidirana odlukama Vrhovnog suda Bosne i Hercegovine na 12 godina i Saveznog suda iz oktobra 1985. godine na 9 godina.

"Dvadeset petog novembra 1988. godine negdje između tri i četiri sata poslije podne, pozvan sam u upravu zatvora. Tamo mi je komandir straže Malko Koroman, u svečanoj uniformi i svečanim glasom, pročitao odluku Predsjedništva Jugoslavije da se oslobađam daljeg izdržavanja kazne. Bio je to dvije hiljade i sedamdeset peti dan mog zatvora. Iza mene su ostale godine "koje su pojeli skakavci".

Po izlasku na slobodu u mnogim intervjuima govorio sam o procesu(...) Odgovarao sam da osvete neće biti. I nije je bilo. Svi akteri procesa, isljednici, tužioci i sudije nastavili su normalno živjeti i raditi svoj posao, neki su čak ostali na funkcijama. Kao političar sam im oprostio. Kao čovjek – nisam.", napisao je Alija Izetbegović u svojim Sjećanjima.

Sjećanje na gaziju i šehida Ramiza Salčina

Svake godine, 22. augusta, se obilježava pogibija Ramiza Salčina, jednog od simbola otpora sarajevske Općine Novi Grad u početnom periodu agresije na našu zemlju.

Salčin je ubijen na Vojničkom polju, iz snajperskog gnijezda u okupiranim Nedžarićima. Sahranjen je na šehidskom Mezarju na Kovačima, a posthumno je odlikovan „Zlatnim ljiljanom“.

"Dragi predsjednici i prijatelji, u Bosni se ne brani samo Bosna. U Bosni se brani Evropa. Brane se Helsinški akti, Pariška povelja i drugi dokumenti na kojima se zaklela Evropa.

Ako se ne spasi Bosna, onda nemaju smisla ni te povelje ni akti. U nekoj ludoj nadi mi pokušavamo da sačuvamo viziju o građanskoj i kosmopolitskoj Bosni i Hercegovini. Ali to neće biti moguće bez međunarodne podrške. Mi smo neizmerno zahvalni za humanitarnu pomoć koju nam šaljete. Ali to ne može spasiti Bosnu od agresije. Agresija i njene posljedice se ne mogu suzbiti milostinjom, to je poruka građana moje zemlje koju vam prenosim", kazao je Alija Izetbegović u govoru na Trećoj plenarnoj sjednici KEBS-a (Helsinki, 9. septembra 1992. godine).

FOTO: Arhiva Muzeja "Alija Izetbegović"



Kulturocid – 29 godina od kada je zapaljena Vijećnica




FOTO: AP Photo

Sarajevska Vijećnica, dragulj pseudo-maurskog stila u arhitekturi, u kojoj je do tog 25. augusta 1992. godine bila smještena Nacionalna i univerzitetska biblioteka Bosne i Hercegovine, zapaljena je od strane srpskog agresora, te je u požaru nestalo preko 90% knjižnog fonda.

Na dužnosti komandanta Sarajevsko-romanijskog korpusa agresorske VRS tada je bio general Tomislav Šipčić. Krivična prijava protiv Tomislava Šipčića je podnesena 31. januara 2011. godine od strane Instituta za istraživanje zločina protiv čovječnosti i međunarodnog prava, te je ista pet godina kasnije ustupljena Tužilaštvu BiH na nadležni postupak.

"U Bosni je, zadnjih godinu dana porušeno ili teško oštećeno preko 800 džamija, uništene su mnoge medrese i vakufi, spaljen Orijentalni institut u Sarajevu, te drevna biblioteka u zgradi sarajevske Vijećnice(...) Opstanak Bosne će biti pobjeda prava na izbor i različitost, pobjeda dvadesetog vijeka nad povam-pirenim srednjim vijekom.

U Bosni su napadnute sve ljudske svetinje. Stoga sa pravom očekujemo da se svijet konačno stavi u odbranu elementarnih vrijednosti civilizacije.", napisao je Alija Izetbegović u tekstu iz aprila 1993. godine, sačuvanog u njegovoj ličnoj arhivi.



FOTO: Sarajevograd.ba

Godišnjica masakra ispred tržnice Markale

Sa pozicija agresorske VRS, tog 28. augusta 1995. godine u 11 h, je ispaljena minobacačka granata koja je ubila 43 građana Sarajeva, a njih 84 teško ranila ispred tržnice Markale.

Tada su još uvijek bila svježa bolna sjećanja na genocid u Srebrenici, kao i prvi masakr koji se desio na otvorenoj pijaci Markale 4. februara 1994. godine. Drugi masakr na Markalama bio je direktan povod za NATO operaciju zračnih napada pod nazivom "Namjerna sila" (eng. Deliberate force).

Sa pijetetom se sjećamo poginulih koji su ubijeni tog dana:

Omer Ajanović, Hidajet Alić, Salko Alić, Zeno Bašević, Husein Baktašević, Sevda Brkan-Kruščica, Vera Brutus-Đukić, Halida Cepić, Paša Crnčalo, Mejra Cocalić, Razija Čolić, Esad Čoranbegić, Dario Dlouhi, Salko Duraković, Alija Dževlan, Najla Fazlić, Rijad Garbo, Ibrahim Hajvaz, Meho Herceglja, Jasmina Hodžić, Hajrudin Hozo, Jusuf Hašimbegović, Adnan Ibrahimagić, Ilija Karanović, Mesudija Kerović, Vehid Komar, Muhamed Kukić, Mirsad Kovačević, Hašim Kurtović, Ismet Klarić, Masija Lončar, Osman Mahmutović, Senad Muratović, Goran Poturković, Blaženka Smoljan, Hamid Smajlhodžić, Hajro Šatrović, Samir Topuzović, Hamza Tunović, Ajdin Vukotić, Sabaheta Vukotić, Meho Zečo i Narima Žiga.

Godišnjica početka NATO-ove operacije „Namjerna sila“



FOTO: Historija.ba

Dva dana nakon masakra ispred tržnice Markale, 30. augusta 1995. godine, otpočeli su NATO zračni napadi na pozicije agresorske Vojske Republike Srpske.

Operacija „Namjerna sila“ (eng. Deliberate force) započela je u ranim jutarnjim satima, te je kombinovana sa vojnim uspjehom Armije Republike Bosne i Hercegovine na terenu.

Većina napada je izvršena sa zračne baze u Avianu u Italiji, te sa američkog nosača aviona Theodore Roosevelt u Jadranskom moru. NATO zračni napadi su zvanično potrajali do 20. septembra 1995. godine, te je američka mirovna inicijativa dobila na zamahu utvrđivanjem bazičnih principa mirovnog sporazuma za Bosnu i Hercegovinu.



FOTO: Faktor.ba

Godišnjica formiranja 1. korpusa Armije Republike Bosne i Hercegovine

Na temelju odluke o formiranju korpusa Armije Republike Bosne i Hercegovine done-sene 18. augusta 1992. godine, formiran je Prvi korpus Armije Republike Bosne i Hercegovine, 1. septembra 1992. godine sa sjedištem u Sarajevu.

U korpus su bile uključene sve prethodno formirane vojne jedinice sarajevske regije, koje su u septembru 1992. godine brojale 28.916 pripadnika, a u cijeloj zoni odgovornosti korpusa 63.796 pripadnika. Tokom ratnog perioda, funkciju komandanta korpusa su obnašali Mustafa Hajrulahović – Talijan, Vahid Karavelić i Nedžad Ajnadžić.

Prvi korpus je bio jedan od stubova odbrane naše zemlje, i sa posebnim pijetetom odajemo priznanje svim njegovim pripadnicima, posebno onima koji su svojim životima odbranili našu domovinu.

“Govori se mnogo o pomirenju naroda. Pa, mi i ne okrivljujemo narod, mi okrivljujemo ratne zločince, a to su uvijek pojedinci, bez obzira što ih je, nažalost, mnogo. Njima ne možemo i nećemo oprostiti. Njih ćemo goniti do kraja svijeta. Nestat će sa lica ove lijepe zemlje kao što je nestao dim njihovih topova i granata. Završit ću ovo kratko obraćanje riječima moga omiljenog pjesnika: “Velikom Bogom se kunemo da robovi nikada biti nećemo.”, kazao je Alija Izetbegović u obraćanju na smotri povodom pete godišnjice osnivanja Armije Republike Bosne i Hercegovine.

Godišnjica prve ratne predstave „Sklonište“



FOTO: SARTR

Na sceni novoosnovanog Sarajevskog ratnog teatra, prva ratna pozorišna predstava „Sklonište“ je premijerno održana 6. septembra 1992. godine.

Predstava je rađena po tekstu Safeta Plakala, i u režiji Dubravka Bibanovića. Tokom opsade Sarajeva i agresije na našu zemlju, predstava je odigrana 97 puta i bila je dijelom kulturnog otpora. Na sceni su igrali: Jasna Diklić, Nisveta Omerbašić, Nebojša Veljović, Miodrag Trifunov, Senad Bašić, Zoran Bečić, Irena Mula-muhić i Alija Aljović.

„Pozorišta su nastavila živjeti, a likovne galerije nisu nikada zatvorile svoja vrata, književnici su se još češće susretali sa svojim čitaocima. Bio je to fenomen koji smo razumjeli kao duh samoniklog kulturnog otpora ili prkos naroda koji odbija da bude zaplašen silom i ponižen zločinom(...) Pozorišta u Sarajevu, Zenici i Tuzli izvela su više od 150 predstava, od kojih je dvadesetak napisano u toku rata(...) Našim pozorišnim djelatnicima dolazile su iz svijeta veoma ugledne kolege, a domaća pozorišta su išla na turneje i festivale širom Evrope“, kazao je predsjednik Izetbegović u svom govoru na skupu „Bohemiae Foundation“ u Pragu, 13. oktobra 1995. godine.

Godišnjica oslobođenja Donjeg Vakufa



FOTO: Arhiva Muzeja "Alija Izetbegović"

Neposredno nakon što je počinjen masakr nad civilima u selu Oborci, jedinice 7. korpusa Armije Republike Bosne i Hercegovine su iz pravca Bugojna i Prusca u večernjim satima 13. septembra 1995. godine oslobodile Donji Vakuf. Paralelno sa akcijama kod Donjeg Vakufa vođene su i aktivnosti u pravcu Turbeta.

U oslobođeni grad se ušlo oko 22 h, te vrijedi istaći zalaganje 77. Vrbaske divizije te 17. Viteške krajiške brigade. General Mehmed Alagić je odmah po ulasku naših jedinica naredio da se konsoliduje vlast u cilju zaštite imovine i dobara. Bitno je istaći da i pored srušenih svih džamija u Donjem Vakufu i okolini, pravoslavna crkva u centru grada je ostala netaknuta.

„Stoga, mogu vam reći, da osjećam dvostruki ponos kad odem negdje. Jedno što pripadam narodu koji je pokazao izvanrednu žilavost i hrabrost, i drugo, što pripadam narodu, koji uprkos svemu, nije okaljao obraz u ovoj teškoj nevolji, punoj izazova(...) Vi idete odavde da vojsci govorite neke stvari. Govorite im upravo to. Ne smiju da progone nejač. Naša vojska neće pobijediti, mi ne možemo pobijediti ako mi ne budemo narodna vojska u tom smislu da nas se narod ne boji. Teško toj vojsci koje se narod boji. Ta vojska ne može pobijediti. Na kraju, sva snaga koju mi imamo i danas je iz naroda. Mi smo dio tog naroda. A i snagu koju imamo, crpimo iz tog naroda. Odatle, poput biljke, sišemo sokove, odatle se hranimo.“, kazao je rahmetli predsjednik Alija Izetbegović u obraćanju polaznicima seminara Uprave za moral ŠVK Armije Republike Bosne i Hercegovine, u Sarajevu 9. decembra 1993. godine“.



FOTO: Arhiva Muzeja "Alija Izetbegović"

Sjećanje na Nedžada Ibrišimovića

Ljudska i literarna ostavština Nedžada Ibrišimovića je obilježila historijske periode poznate po iskkušenjima po našu zemlju.

Biografija Nedžada Ibrišimovića je bogata i plodonosna, imajući u vidu da se radilo o vajar, slikaru, piscu i književniku, te sa pravom možemo reći da je svojim djelovanjem neizmjereno obogatio umjetnost Bosne i Hercegovine. Djela su mu prevedena na brojne svjetske jezike. Preselio je 15. septembra 2011. godine u 71. godini života.

„Sada ostajem u svojoj Bosni, iako je život oko mene prijeteći kaos, a politika čisti šund. Pa ipak, prvi put u životu volim jednog prednjaka, rukovodioca, političara, a to je Alija Izetbegović. I ako, ne daj Bože, padne, ja ga drugim nikad neću zamijeniti. Meni je u životu dovoljno da mi se sviđa jedan političar. A što mnogi koji nisu muslimani, njegove mudre, dobre, plemenite i razumne riječi i djela ne prihvataju, oni to ne prihvataju samo stoga što dolaze od jednog muslimana a to su nji-

hove grdne predrasude, to su uski, nesnošljivi i sebični ljudi, ako ne i nešto gore. Alija je do sada, hvala Bogu, osaburio ono što je malo ko.“ – Akademik Nedžad Ibrišimović (Ruhani i šejtani inspiracija)

“U pauzi zasjedanja Drugog bošnjačkog sabora u Holiday Innu u Sarajevu neko je zidove oblijepio slikama Alije Izetbegovića. Kad je on stupio za govornicu, prvo što je rekao je da se one njegove slike skinu. Da to nisam vidio i čuo 1993., ja ga sada ne bih rahat mogao zvati Alija, a još manje dragi Alija, mada mi nikad nije ni palo pa pamet da ga lično oslovljavam samo imenom. On je za mene uvijek bio moj Predsjednik!” – Akademik Nedžad Ibrišimović (Umjerenost političke misli i djelovanja Alije Izetbegovića, Admir Mulaosmanović i Anes Džunuzović, Biblioteka Mladi Muslimani, Sarajevo, 2015., str. 12)

Početak oslobodilačke operacije „Sana-95“ – Oslobođenje Bosanskog Petrovca



FOTO: Arhiva Muzeja "Alija Izetbegović"

Oslobodilačka operacija „Sana-95“ otpočela je u jutarnjim satima 13. septembra 1995. godine, te je predstavljala, kasnije će ispostaviti, najveći podvig Armije Republike Bosne i Hercegovine u pogledu oslobođene teritorije.

U mjesec dana operacije oslobođeno je šest krajiških gradova i naselja, te stvoreni preduslovi za potpisivanje Daytonskog mirovnog sporazuma.

Jedinice prvog ešalona 502. Viteške brigade oko ponoći 14./15. septembra 1995. godine pobjedonosno ulaze u Bosanski Petrovac, čime su stvoreni preduslovi za dalja borbena dejstva prema Ključu i Sanskom Mostu.

„Ovo je teško i istovremeno slavno doba Bosne. Teškoće su ogromne, ali i šanse su veće nego ikada u historiji. Mi vjerujemo da će svjetlo odnijeti pobjedu nad mrakom i život nad smrću.“, bile su riječi kojima je Alija Izetbegović zaključio svoje izlaganje na VII sjednici Glavnog odbora SDA, u Sarajevu 27. marta 1995. godine.



FOTO: Arhiva Muzeja "Alija Izetbegović"

Dan kada su jedinice 5. korpusa Armije RBiH oslobodile Ključ

Neposredno nakon oslobođenja Bosanskog Petrovca, 5. korpus Armije Republike Bosne i Hercegovine je silovito nastavio svoj oslobodilački pohod.

Nakon uvođenja 501. Slavne brigade u borbe protiv agresorske VRS, komandant 5. korpusa, general Atif Dudaković odlučuje ojačati pozicije 501. Slavne brigade sa tri tenka.

U pohodu od Bosanskog Petrovca ka Ključu, dvije brigade (501. Sbr i 510. Obr) imale su bogat ratni plijen koji se sastojao od 8 tenkova, 10 samohotki, 3 PAT „Prage“ i ostalih znatnih materijalno-tehničkih sredstava. Naše jedinice su ušle u Ključ oko ponoći 15./16. septembra 1995. godine.

„Armija nije oslobodila Bosnu, ali jeste odbranila Bosnu. Zapamtite: bez Armije sva Bosna bi bila jedna velika Srebrenica(...) Nemojte zaboraviti, kada razmišljate o Armiji kako je ona prošla put od malih spontano stvorenih jedinica, preko Patriotske lige i Zenlenih beretki – da bi danas bila disciplinirana vojska pod jedinstvenom komandom.“, riječi su predsjednika Alije Izetbegovića u izlaganju na vanrednoj sjednici Glavnog odbora SDA, u Zenici 5. augusta 1995. godine.

MUZEJ "ALIJA IZETBEGOVIĆ" SA PONOSOM PREDSTAVLJA

IZABRANA DJELA ALIJE IZETBEGOVIĆA

"ISLAMSKA DEKLARACIJA", "ISLAM IZMEĐU ISTOKA I ZAPADA",
"SJEĆANJA", "MOJ BIJEG U SLOBODU"

KOMPLET KNJIGA JE DOSTUPAN U SUVENIRNICI MUZEJA, A
MOGUĆE GA JE NARUČITI I PUTEM MAILA
(MUZEJALIJAIZETBEGOVICI@GMAIL.COM)

ILI POZIVOM NA BROJ +387 33 574 271
CIJENA KOMPLETA IZABRANIH DIJELA IZNOSI 150 KM.



OFICIJELNI
DISTRIBUTER

